

Les plus anciens documents linguistiques de la France
Corpus : chartes de Saône-et-Loire (chSL)
Responsable du corpus : Martin-D. Glessgen
Édition de la charte : Julia Alletsgruber (révision: D. Kihai)

chSL 099

Édition critique

Le lundi après la St-Vincent, 29 janvier 1331 [n. st.]

Type de document: charte: sentence

Auteur: Henri de Poncer

Sceau: Bailliage de Dijon

Support: Original parchemin jadis scellé

Lieu de conservation: AD SL H 33, n°14

Transcription de la charte

1 A touz ceaux qui verront et orront ces presentes lettres: **2** Nous Henriz de Poncer, tenanz le leu et l'assise à Buxi de noble homme et saige monsoignour Jehan de Chastoillon \2 chevalier le duc de Borgogne baillif de Digenois **3** façons savoir **4** que cum cause d'appeaul feusse mehue à Buxi par devant monsoignour le baillif devant dit **5** entre le procurour et en non de \3 procurour de noble homme monsoignour Jehan Daulmais chevalier soignour de Martiller d'une part **6** et le procurour et en non de procurour de religieuses parsones l'abbé et le convant de la Ferté \4 sus Grone d'autre· **7** sus le fait et les choses contenues en la sentance en la quele ces presentes sunt annexés, **8** et la quel sentance li provost de Buxi avoit doné pour les diz \5 religieux contre le dit soignour de Martiller·/. **9** Et de la quele sentance li diz procurours dou dit soignour de Martiller s'estoit santiz agrevez et en n'avoit appellé au dit monsoignour \6 le baillif· **10** et pour ce avoit fait ajorner les diz religieux à certaine jornee pour devant le dit monsoignour le baillif pour aler avant en la cause d'appeaul pour tant come raisons \7 seront· **11** A la quele jornee les dictes parties se comparurent et se boterent en droit sus les choses contenues en la dicte sentance, **12** et apres ce plusours jornés adsignés es dictes \8 parties pour devant le dit monsoignour le baillif pour oir droit en la dicte cause d'appeaul· **13** A la par_fin jornee adsigné es dictes parties par devant le dit monsoignour le baillif pour oir droit tranchiemant \9 en la dicte cause d'appeaul, **14** c'est à-savoir le lundi après la feste saint Vincent premier jour de l'assise de Buxi· **15** à la quele jornee Parrenoz Rufins clerc de Sercet procurour et en non de procurour \10 dou dit soignour de Martiller d'une part· **16** et frere Estienes de Sainche Columbe celleriers et procurours et en non de procurour des diz

religieux de la Ferté d'autre· **17** estant en jugemant pour \11 devant nous *et* requeranz droit sus ce à-grant instance· **18** Vehu touz le p rocés, les esloiz et tout le demené fait en la cause principaul et diligemmant examiné/,//. **19** usé dou consoil \12 de prodomes *et* saiges/,//. **20** heanz Deu tant solemant devant les heauls en non dou Pere *et* dou Fil *et* dou Saint Esperit pronuncions et à droit *par* nostre sentance diffinitive **21** le dit provost \13 de Buxi avoir bien p rononcé *et* le dit procureur dou soignour de Martiller en non que desus avoir mal appelé, **22** *et* condampnons *par* nostre dicte sentance le dit soignour de \14 Martiller es despans des diz religieux faiz en la dicte cause d'apeaul, **23** la cassacion des quels nous requerons au dit monsoignour le baillif ou à nous· **24** Ou tesmonage de la quel chose \15 nous havons seallés ces lettres dou seaul es causes dou bailliage de Digenois, **25** faites *et* donés à Buxi le lundi dessus dit l'an de grace· mil ·CCC/. *et* trante/·.